

西
夏
書
事

西夏書事卷八

青浦 吳廣成西齋 纂

景德元年

契丹統和二十二年

春正月保吉卒

保吉創勢日增自度孤危囑德明曰爾當傾心內

屬一表不聽則再請雖累百表不得請勿止也

李氏

長編云觀德明初報張崇貴書云未葬難發表章意猶倔強不服朝廷多方招諭僅得其款附耳疑繼遷此等語或德明假托故二年後乃言之非實情也考數語見宋史向敏中傳載在景德初故列此又謂張浦曰公等並起等夷誼同兄弟孺子幼

長兵間備嘗艱苦今俾以靈夏之衆雖不能與南

北爭衡公等戮力輔之識時審務或能負荷舊業

為前人光吾無憾矣言訖卒時月之二日也遼史統和

二十一年夏五月丁巳西平王李繼遷薨其子德昭遣使告哀統和二十一年宋咸平六年也王氏

東都事畧及李氏長編亦云咸平六年冬繼遷中流矢至靈州三十里死考宋史夏國傳景德元年

正月二日卒真宗紀景德元年二月環慶部署奏李繼遷死潘羅支獻捷前三書誤年四十

一繼遷死應是四十一宋史夏國傳作年四十二查帝紀年數自知

按綱目去官書卒多貶詞保吉去官明其不得

為宋臣也不得為宋臣曷不遵盜賊酋帥例書

死而書卒何則以保吉為西夏之祖傳祚繼世

要非隗囂公孫述等無成者比也故以僭國創業例書

論曰繼遷生而英奇長而慄悍方其任司蕃落地據銀州當繼捧入覲之初鮮引義力爭之舉蓋慰其兄也素矣迨詔使護送諸父昆弟連袂歸朝方始奮其雄才策其群力激羌戎以先烈約契丹爲強援遂使關右震驚中朝旰食控弦靈武扼平夏之要衝驅馬涼州成河西之右臂于是五州盡復諸族懾從逆者攻以兵順者役

其衆卒之暴戾速亡驕盈致敗不死于天討而
死于流矢佳兵不祥理固然耶然夏綏傾覆沙
磧流離田少一成卒無一旅終能恢萬里之基
創累世之業亦可謂有志者事竟成也

子德明嗣

德明保吉妻野利氏生深沉有器度多權謀時年
二十三嗣位于保吉柩前稱定難軍留後以左都
押牙張浦兼行軍左司馬綏州刺史趙保寧兼右
司馬指揮使賀承珍兼左都押牙劉仁勗爲右都

押牙破丑重遇貴爲都知蕃落使白文壽賀守文
爲都知兵馬使何憲白文贊爲孔目官郝貴王旻
等爲牙校復以李繼瑗爲夏州防禦使李延信爲
銀州防禦使其餘陞賞有差

二月告哀于契丹

契丹主贈保吉尙書令遣西上閤門使丁振弔慰
遼史禮志夏告終使至契丹主于行宮左右下御
帳設使客幕次于東南使者入有司以嗣子表狀
先呈樞密院准備奏呈先引北面臣僚各常服近
御帳相對其餘臣僚並朝服依班位序立引使人
右入至丹墀面殿立引右上立揖少前拜跪奏訖
宣問若嗣子已立恭身受旨奏訖復位嗣子未立

不宣問引右下丹墀面北鞠躬通班畢引面殿再拜奏聖躬萬福再拜出班謝面天顏復位再拜出班謝遠接復位再拜贊祇候退就幕次再入依前面北鞠躬通辭再拜敘戀闕再拜贊好去乃畢

三月麟府兵襲神堆禦之失利

夏州蕃部寇洪德砦閤門祇候段守倫率兵拒之力戰三日擒獲甚衆事聞眞宗諭緣邊部署鈐轄乘保吉死速圖攻取之策于是麟府路出兵攻神堆夏兵戰不勝營柵盡破

始遣使如鄜延

鄜延鈐轄張崇貴移書德明諭以朝廷恩信德明

遣使報稱未葬難發表章請俟釋服稟命崇貴請
遣使弔問令大臣至邊召其親信張浦等議之

夏四月夏州蕃部指揮使都尾走降于洪德砦

環慶邊臣皆以德明初立乞行招撫知鎮戎軍曹
瑋言繼遷擅河南地二十年兵不解甲使中國有
西顧之憂今其國危子弱部族離心不卽乘此捕
滅後更強盛不可制矣願假臣輕兵出其不意擒
德明送闕下復河南爲郡縣此其時也眞宗欲以
恩致之詔德明審圖去就並諭蕃族萬山萬遇龐

羅逝安鹽州李文信萬子都虞候及都軍吳守正
馬尾等能率部下歸順者授團練使銀萬兩絹萬
匹錢五萬緡茶五千斤其有亡命叛去者皆釋罪
甄錄諸蕃以保吉殘暴久不聊生聞詔書招撫爭
觀之無不泣下于是夏州蕃部指揮使都尾率屬
入降 張溥曰西事自靈州之陷夏乃日逞迨繼
遷死德明初立斯時國危子弱眞宗不從曹瑋之
請恢復河南至元昊習兵而宋重困矣但慕春秋
不伐喪而不知臥榻鼯睡太祖有明戒也譏宋亡

者云聲容盛而武備衰議論多而成功少于夏事已見之矣

五月子元昊生

德明三娶一衛慕氏次咩米氏次訛藏屈曠氏衛慕氏銀州大族嘗與德明游賀蘭山夜夢白龍繞體遂有妊懷十二月至是月五日生啼聲英異兩目奕奕有青光德明愛之字爲嵬埋

曾氏隆平集作小名崖塊

國語謂惜爲嵬富貴爲埋也

涼州亂遣兵攻之不克

西涼自保吉死與蘭州龔谷宗哥覓諾諸族謀拒
夏州德明遣兵攻掠朔方節度潘羅支率蕃衆禦
之夏兵不勝而還

趙保忠死

保忠狀貌雄毅居環列奉朝請常怏怏不自得咸
平中丁內艱以本官起復遷金吾衛上將軍判岳
州移復州至是病劇上言有子永奇凶惡不受教
訓乞配春梅州眞宗以戎人獷悍且病語不實授
以永州別駕使監軍察之保忠尋卒贈威塞軍節

度使天禧中錄其孫從吉爲三班奉職

按

保忠臣于宋歿于宋何以書于夏編終其入朝獻地事也去官書死何惡反覆也反覆雖王侯之貴與蠻夷盜賊同書所以誅奸頑于身後而立名教之防也

六月發兵攻者龍族殺朔方節度使潘羅支

初保吉死潘羅支使其甥厮陀完獻捷已遣兄邦逋入奏欲更舉部族及回鶻精兵直抵賀蘭山討除殘孽請發大兵援助眞宗詔涇原部署陳興鼓

四庫全書
卷八
六
衆赴石門策應兵未發保吉故黨迷般囑及日逋
吉羅丹二族亡歸者龍共圖羅支以報仇者龍凡
十三族其六族附迷般等迷般陰請德明遣兵攻
者龍羅支率百餘騎赴援議事間二族猝起戕羅
支于帳下事聞贈羅支武威郡王

復取涼州

潘羅支死西涼大亂六谷諸酋共推羅支弟厮鐸
督爲首領德明乘人心未定率兵復攻西涼取之
秋七月葬保吉于賀蘭山

在山西南麓寶元中元昊稱帝號爲裕陵

八月萬子軍主以兵寇永寧砦

萬子軍主與萬山萬遇等族同附保吉數爲中國
患鄜延鈐轄張崇貴築臺于保安軍北召戎人所
親信者與定盟約歸順者日衆萬子軍主不應率
屬犯永寧砦知鎮戎軍曹瑋與河西藥令族合蒜
合擊敗之斬首二百餘級于是蕃官茄羅兀臧成
王等皆獻馬贖罪請內附

九月使如契丹謝弔贈

并以保吉遺物獻

冬十月銀州屬蕃侵麟州

銀州蕃族乘潘羅支身亡聚衆攻麟州西京作坊使李繼周率兵會永寧軍主李繼福擊退之

十二月孔目官何憲走降于邠州

憲靈州人保吉破州城時得之愛其才使掌兵數事德明立授孔目官嘗勸德明勿殺潘羅支以爲後日納款計不聽乃挈家乘間走邠州請降部署以聞眞宗詔令乘傳赴闕

景德二年

契丹統和二十三年

春正月德明遣趙保寧如契丹

請封

德明嗣職期年未膺封冊蕃族多懷觀望行軍司馬趙保寧言國家疆宇雖廓自西涼擾亂先王被害蕃衆驚疑若不假北朝威令懾之恐人心未易靖也德明遂遣保寧獻方物契丹以請封冊契丹主曰此吾甥也封冊當時至待保寧加禮遣回二月以下青城告契丹

契丹自澶州之敗雖與中國講和其戎心未嘗一

日忘故許德明封冊以爲臂使之需德明欲臣中國慮其見疑乃以兵下青城告

按青城之役宋遼二史不載亦僞詞也德明嗣位未幾詐僞一如乃父洵亂世奸雄哉

出兵寇環州破旺家族執首領都子

蕃部累奏德明迫脇攻劫狀眞宗命安撫使向敏中諭之敏中言掠去蕃口勢不能給還惟令自作要約以絕後犯德明不聽舉兵入環州境攻熟戶旺家族執都子等去都子所部亦獲德明軍主慶

吉以獻

附

宋史吐蕃傳景德二年厮鐸督遣甥阿昔來貢且上與德明戰功狀並言蕃帳周斯那支有智勇請授六谷都巡檢使上從之攷李氏長編載此事于是年二月其戰在何時真宗紀及夏國傳皆不書

夏六月遣牙將王旻入貢請降

德明聞石隰部署耿全斌率兵入伏洛關招誘蕃族諸部內附者數千人禁之不能止謀之張浦曰

先王遺命應卽表聞緣降之太易彼將輕我今兵
復西涼國威已振請之此其時矣乃遣王旻以保
吉遺言奉表入獻畧曰同軌同文王者大車書于
一統至神至聖遠人瞻天日于無疆臣父承闔邊
陲蒙恩優渥方且心乎王室拱北極而抒誠靡意
難起同袍謂黨項諸族也糾西蕃而生事遂致鞠躬盡瘁
賁恨莫伸然而戀闕深情平時懇切作忠遺教垂
沒叮嚀臣賦性顓蒙素懷恭順向居苦塊欲進表
而無由今屬禪除敢請臣之或後恭惟皇帝陛下

德超遠古道建大中海不擇乎細流朝宗者必納
山豈遺乎土壤環向者咸依伏望俯鑒孤忠得盡
小心翼翼垂憐微末克遵先訓諄諄存沒啣恩子
孫感德云云眞宗見表賜旻錦袍銀帶遣侍禁夏
居厚持詔荅之賞給甚厚已遣閤門通事舍人焦
守節諭張崇貴以保吉昔時變遷之狀今當使德
明白爲誓約納靈州土疆止居平夏遣子弟入宿
衛盡散蕃漢兵送還掠去官吏及質口封境之上
有侵擾者稟命朝廷令旨凡七事則許德明以定

難節度予歲賜給內地節度俸聽回圖往來及放行青鹽凡五事崇貴等呼旻示之如能順命卽降恩旨繼而德明使張浦詣崇貴面議但多邀求不肯自爲誓約也

秋七月契丹冊爲西平王

契丹主使北院樞密副使蕭承德持節封德明西平王復姓李氏賜車旗衣幣等物

九月都知兵馬使白文壽入貢

眞宗以德明誓約未定命樞密使向敏中自永興

軍赴鄜延經畧之敏中使人招諭德明乃遣文壽
入貢

冬十月趙保寧如契丹謝封冊

義成公主無所出契丹冊德明時諭以善事公主
克光先烈德明遣保寧往謝且曰恪遵諭詔未敢
有違也

十二月教練使郝貴入貢

中國答賜甚厚

博州防禦使李克文卒

克文在鎮恭謹守法保吉之亂口不言兵卒贈岳
州防禦使大中祥符中子繼元爲閣門祗候上表
言已與繼遷本五從兄弟名同上字心甚恥之願
改名守元眞宗詔從之擢供備庫副使厚其廩給

按

具官書卒錄賢也克文實肇夏州之禍然非
其意料所及况入朝以後頗稱恭順卽博州之
置亦不聞稍有怨悻較之保忠可謂李氏賢裔
矣故仍得書于夏編

景德三年

契丹統和二十四年

夏四月德明妙娥等族走降于

鎮戎軍

夏州妙娥熟鬼數大族見德明孤弱以蕃書移鎮
戎軍請拔帳自歸諸將猶豫不敢應知軍曹瑋曰
德明野心不折其翮後必飛揚卽日將兵出石門
薄天都山受降者內徙諸小族皆望風納質德明
不敢拒

遣使貢馬表乞恩命

德明先遣左都押牙賀承珍獻馬已遣兵馬使賀
守文入貢先是向敏中張崇貴屢與德明書議立

蕃約德明遷延其辭于七事未肯承也表文但云
乞先賜恩命餘徐議之

六月周伯星見遣使入賀

德明聞中國司天奏周伯星見復遣賀承珍入賀
秋七月獻馬謝賜

德明獻馬五十匹謝連次賜荅之物眞宗復賜襲
衣金帶器幣並諭自今荅賜勿復謝恩

熟戶潘保薛等內投表請誅之不得

保吉曾掠延州蕃部潘保薛四族安置綏州已而

挈族內奔鎮戎軍鈐轄秦翰出兵應之德明訴于朝願舉刑章翰言四族本延州熟戶茲還舊居非新有招納也眞宗詔張崇貴移報德明自今勿復侵預境外

八月謀侵麟州

河東蕃落諸將因德明信約未定皆訓練士馬料率器械以待德明謂其圖已點集諸族戎人謀入河東掠麟府諸州內屬蕃戶偵知以報向敏中請命帥臣鎮之已而德明兵不出

按謀侵未侵也何以書誅其心也于是抄掠之計集議已定特因事機洩露聞有備中止耳書以罪之

斬渭州叛卒于境上

渭州戍卒十餘人叛入夏州德明納之偵者以告都鈐轄曹瑋瑋方與客奕佯怒曰我固遣之汝顯言之何也德明聞卽斬叛者投其首于境上

九月遣使進誓表

先是眞宗詔許德明毋納靈州止遣子弟入宿衛

及母得攻劫西路進奉蕃部縱有爭競並取朝廷
和約他約悉除之然猶不聽回圖往來禁放青鹽
至是河西諸羌多請內附眞宗因德明歸順下詔
諭止令其各守疆場德明感恩遣右都押牙劉仁
勗奉誓表請藏盟府且言父有遺命永無貳心又
言所乞回圖及放青鹽禁雖宣命未許然誓立功
効冀爲後日賞典也

按
此西夏進誓表之始

行牒索降蕃于鄜延

景德初綏州蕃部指揮麻結內附眞宗命給府州地居之德明行牒鄜延請還本道朝議以麻結降在進誓表前諭止之

按此西夏行牒之始

冬十月復受定難軍節度使爵西平王

眞宗嘉德明降授特進檢校太師兼侍中持節都督夏州諸軍事行夏州刺史上柱國充定難軍節度夏銀綬宥靜等州管內觀察處置押蕃落等使宋史石普傳趙德明納款詔降制命鄜延路都總管石普言不宜授以押蕃落使使之總制屬羌則

強不可制矣乃止兼管
內蕃落使與夏國傳異
爵西平王食邑六千戶實
封三千戶又賜推忠保順
翊戴亮節功臣號遣內
侍左右班都知張崇貴太
常博士趙湘充旌節官
告使賜襲衣錦帶銀鞍勒
馬銀萬兩絹萬匹錢三
萬貫茶二萬斤
劉平曰趙德明僻守一隅
畏王師問罪數馳驛奏願
備藩臣于時朝廷若止棄
銀夏綏靜四州限山爲界
則德明遠居漠北可無後
日患矣乃以靈宥兩州及
山界人戶并授之山界
蕃漢勁勇善戰使德明得
畜甲治兵漸滋邊患此

鄜延環慶涇原秦隴諸州終不能弛備也

按此李氏復王爵之始

責子弟入質不遣

詔使數責子弟入質德明以入質非先世故事不肯遣惟獻御馬一十五匹散馬七百匹橐駝三百頭謝恩

十一月使請俸賜

德明使至京師特請俸子因市禁物隱關算爲奸利朝議聽之自是歲以爲常

十二月環州降酋蘇尙娘叛執之

西界蕃部奔投內地者德明輒入境追逐久之不止乃表言臣所管蕃族近日多投銀戎軍蓋秦翰等招納不已也今臣已受朝命乞賜曉諭眞宗以表示邊臣止之環州酋蘇尙娘曾禦保吉有勞屢告夏州機事授臨州刺史已叛投德明至是復求內附部署以聞廷議以尙娘反覆無信特恐狙詐以誤邊吏又使德明緣此爲辭不可納也德明聞遣兵執尙娘歸

西夏書事卷八終

西夏書事卷九

青浦 吳廣成西齋 纂

景德四年

契丹統和二十五年

春三月德明使謝廩俸

宋制節度使俸給錢四百千粟一百五十石春冬加絹各百匹大綾各二十匹小綾各三十匹羅各十匹綿各五百兩惟諸王皇族充節度及藩鎮管軍節度則有之外蕃遙領者不與焉眞宗賜德明廩俸悉與內地節度同德明感恩遣使奉表自稱草土臣獻馬五百匹橐駝三百頭以謝故事賜物

謝恩止給來使緡帛真宗以德明進奉頻數加賜
襲衣金帶器幣

請于京師市易

德明表請進奉使至京師市所需物詔從之

夏四月建館舍于綏夏二州

德明以中國恩禮優渥天使頻臨遂于綏夏州建
館舍二曰承恩曰迎暉五百里內道路橋梁修治
整飭聞朝使至必遣親信重臣郊迎道左禮儀中
節漸有華風

五月母罔氏卒遣使告哀

德明嫡母罔氏卒遣都押牙賀承珍詣京師告哀
眞宗命殿中丞趙稹爲弔贈兼起復官告使授德
明鎮軍大將軍右金吾衛上將軍員外置同正員
餘如故德明以鼓樂迎至柩前明日衣禪衣受賜
泣對使者曰蕃夷母喪蒙天子弔贈起復寵榮極
矣及葬請修供五臺山十寺爲母祈福眞宗遣閣
門祇候袁瑀爲致祭使隨護送德明所供物至五
臺

李氏長編德明請詣五臺寺修設追薦其母陳
堯叟欲令張崇貴諭以路由河東多涉軍壘不

便聽由鎮州路上日宜令崇貴荅以不敢奏聞若誠願則聽致施物于鄜延委崇貴差人送五臺也與宋史夏國傳異

按

此西夏告哀中國之始

契丹使來弔祭

且賜起復

行牒延州請止保安軍修驛

自德明納款眞宗令緣邊城池依誓約應行修葺外自餘移徙砦柵開復河道無大小悉禁之時保安軍起葺驛舍德明移牒延州言邊民擾懼不安

願罷其役從之

六月貢馬助皇后園陵

章穆皇后初葬德明獻馬五百匹助修園陵眞宗
嘉納之

索夏州民劉岩等不得秋七月請置榷場于保安軍
先是夏州民劉岩等二十餘人內屬給以延州曠
土耕之而所居當綏州要路德明部族出入多爲
掄戮及德明歸順移牒求岩等復還眞宗難之頗
嚴邊禁德明請置榷場于保安軍許蕃漢貿易朝

讓從之令以駝馬牛羊玉玷琰甘草易緡帛羅綺
以密蠟麝香毛褐獐羚角硃砂柴胡茯苓紅花翎
毛易香藥蠶漆器薑桂等物其非官市者聽與民
交易

按此西夏復互市之始

九月出兵攻六谷不果行

六谷諸酋久推忠順自潘羅支死折邁游龍鉢等
盡歸德明部下惟羅支弟朔方節度西涼府六谷
大首領廝鐸督猶與德明抗德明以六谷世仇意

將阻絕使人使不得列于緣邊屬戶侵掠無虛日
廝鐸督潛以蕃書入訴眞宗令張崇貴諭之德明
不聽率兵屯境上謀取六谷廝鐸督援結回鶻爲
備德明兵不出

冬十月請行儀天歷

宋初用周時舊歷建隆三年始命司天少監王處
訥別造新歷命名應天太平興國中改爲乾元眞
宗嗣位命司天監史序攷驗前法研覈舊文取其
樞要成儀天歷時咸平四年三月也西夏自保吉

倣擾羌戎不知正朔幾二十年德明遣貢使表請
眞宗以新歷并冬服賜之初詔延州牙校賁往比
聞德明葺館舍修道路以待朝命乃命閣門祗候
往賜德明受而行之

按此西夏受歷之始

十一月請于麟州置榷場

眞宗以延州已置不許

大中祥符元年

契丹統和二十六年

春正月德明賜守正功臣

號

益食邑千戶實封四百戶時天書降于承天門故
有是賜守正乃賜中書樞密號也

出兵侵甘州回鶻

回鶻有甘州沙州西州新復州數種而甘州地逼
西夏其可汗夜落紇嘗與沙州可汗祿勝數出兵
爲保吉難保吉死德明思報怨遣將張浦率騎數
千抄掠其境夜落紇出兵拒之浦不能勝

三月復遣萬子等族襲甘州大敗

張浦兵還德明遣萬子等四軍主悉其族兵取六

谷進圖甘州萬子軍主至西涼見六谷兵盛不敢
攻徑趨甘州襲回鶻回鶻偵知設伏示弱不與鬪
俟其過奮擊之剿殺殆盡軍主挺身走免其被擒
者回鶻驅坐于野悉以所獲資糧示之曰爾輩狐
鼠規求小利我則不然盡焚訖乃殺之

夏四月請市青鹽

鹽乃中國利藪鹽州五原縣烏白池所出青白二
鹽味勝解池邊人商販者多西戎久擅其利自保
吉騷動禁止入塞德明初附時力請放行不得是

時見朝廷恩禮日隆致書于鄜延部署張崇貴請之崇貴以聞眞宗以德明所納誓表付崇貴諭之蓋向未載放鹽事也

五月夏州屬戶擾涇原

涇原向少籬籬保吉時鈐轄秦翰規摩要害嘗以三十萬工鑿巨塹數年而成保吉遂不能入寇時夏州屬戶以德明納款輒越塹侵掠涇原德明不禁眞宗遣翰巡視邊部夏人聞翰至懼而退

六月綏銀夏三州旱

綏銀以大理無定兩河爲灌溉近甘涼間則又有
居延鮮卑沙河諸水襟帶迴環故歲無旱澇之虞
是時天時亢旱黃河淤淺諸水源涸居民惶亂邊
臣以聞眞宗詔榷場勿禁西人市糧以賑其乏

秋七月太白犯輿鬼

入積尸

八月自將侵甘州不克

甘州兵乘勝追逐德明不能拒越黃河走免可汗
夜落紇上言乞朝廷署孔目官一員至本道以撫

納羌衆眞宗慰諭之

九月靈夏飢表求粟百萬未得而罷

西北少五穀軍興糧饋多用大麥革豆青麻子之
類其民春食豉子蔓鹹蓮子夏食菰蓉苗小蕪蕒
秋食席雞子地黃葉登廂草冬則菑沙葱野韭柜
霜灰蓀子白蒿鹹松子以爲歲計時綏銀久旱靈
夏禾麥不登民大飢德明遣使奉表求粟百萬斛
廷議不知所出或言德明方納款而敢渝誓請降
詔責之宰相王旦曰第語德明爾土實饑朝廷撫

馭荒遠固當賑救然極塞芻粟屯戍多不可輟易
已敕三司具粟百萬于京師可遣衆來取德明得
詔慚且拜曰朝廷有人臣不合如此遂止續綱目
列此事
于三年冬十二月考李氏長編云此事不審何時
然據羣臣言德明方納款則亦可隱度故因夏州
旱連
敘之

按救患分災禮也春秋之世歲飢告糴何國蔑
有求粟百萬則異矣未得而罷則尤異矣

冬十月遣使入獻賜兼中書令

德明聞中國封泰山遣使入獻眞宗令西京左藏

庫使閻承翰爲加恩官告使賜德明兼中書令益
食邑一千戶實封四百戶承翰因德明于綏夏各
建館舍恭伺王人使還亦請于蒲洛河置館以待
夏使詔以荒餽勞役不許

大中祥符二年

契丹統和二十七年

春三月德明移牒鄜延請

罷慶州濬濠

德明遣人輒由間道賫違禁物竊市于邊環慶都
鈐轄曹瑋發兵濬慶州濠重遏之德明牒鄜延鈐
轄李繼昌言其事中朝方務招納遂罷之

夏四月遣兵攻甘州敗還

夏俗以不報仇爲恥德明與回鶻世仇憤其兵數敗遣張浦將精騎二萬攻甘州可汗夜落紇拒守經旬伺間遣將翟苻守榮夜出兵襲之浦大敗還夜落紇令左溫宰相何居錄越自秦州獻捷表陳兵敗德明其立功首領請加恩賞真宗詔給司戈司階郎將告敕十道使得承制補署

六月諜者盧蒐入環慶被獲

邏卒捕得之法當死真宗詔械送夏州令德明自

處之

冬十一月使請市弩

德明進奉使白守貴請市弓弩朝議以舊制弓矢
兵器不入外夷不許

十二月復出兵侵甘州恒星晝見懼而還

德明精天文通兵法夏俗出兵先卜其法有四一
炙勃以焦艾灼羊髀骨一擗算擗竹于地以求數
若揲蓍然一咒羊夜以羊焚香祝羊又焚穀火布
靜處晨屠羊視其腸胃通則兵無阻心有血則不

利沈括筆談西戎用羊卜謂之跋焦卜師謂之厥
之此以艾灼羊髀骨視其兆謂之炙跋焦其法兆
旁處為客位蓋西戎之屬所居正寢常留中一間
以奉鬼神不敢居之謂之神明主人乃坐其旁以
此占主客勝負又有先咒粟以食羊羊食其粟則
自搖其首乃殺羊視其五臟土人九神
之謂之死跋焦與宋史夏國傳稍異
四聽弓以
矢擊弓弦審其聲知敵至之期與兵交之勝負及
六畜之災祥五穀之凶稔是時德明自出兵攻回
鶻恒星晝見經天卜之不吉大懼還

按德明甘州之役四書矣茲書復甚之也然能
因星變而懼則猶有畏天意焉

契丹使來告哀

承天皇后喪也

大中祥符三年

契丹統和二十八年

春三月德明母野利氏卒

野利氏德明生母既卒廊延路以聞宰臣曰德明頃年以告母喪朝廷錫以命典蕃戎之俗諸母衆多必俟其有請別加商議既而德明不告哀中國亦置之

按

書卒不書告哀著夷俗也夷俗諸母衆多使不勝告然以生母并畧之亦成其爲夷而已矣

夏六月攻河州諸羌破之出大理河築蒼耳平柵

德明境內荒歉與鄰近族帳爭博糶量斛以平物價又點集所部廣作礮樓西攻河州宗哥諸族破之盡掠其貨財出大理河至蒼耳平築柵戍兵與永平界蕃族日相刼殺

遂寇延州

德明遣廊延都鈐轄張崇貴書稱遣牙校貢馬并言延州熟戶明愛侵其綏州地崇貴疑其詐潛遣兵戍境上德明果以兵三千入寇兵未發先遣所

部緣邊貿易潛覘虛實俄而衆突至戍兵出不意
逆擊大敗還

按

此德明擾邊之始前書侵麟府伐其謀也茲
書寇延州實其事也

秋七月蕃族萬子太保掠西蕃貢使于天都山

吐蕃部署綽克宗向屬西涼府咸平中爲趙保吉
所破徙居龕谷至是聞夏州歸順以馬三百匹入
貢過天都山德明屬下萬子太保見而奪之得至
京師僅二十餘匹

此事實錄正史皆不
載今據會要錄之

按上書德明茲書蕃屬上尤下效勢固然也

九月契丹封德明夏國王遂建宮闕于鐵子山

契丹主隆緒以德明朝貢時至遣使持冊封爲夏

國王

宋史夏國傳大中祥符元年契丹遣使冊德明爲大夏國王考遼史聖宗紀大夏國王至

太平元年始封宋史誤

德明益自大役民夫數萬于鐵子山

大起宮室縣亘二十餘里頗極壯麗山在陝西延

州境西北德明駐軍于此蓋欲窺中國也

按

春秋遂者繼事之辭德明因朝廷姑息桀驁

漸形然未敢顯逞也迨契丹予以國號加以王

封遂敢建宮闕窺邊境大起僭端德明之跋扈
固可誅而契丹教猱之罪其又奚辭比書以交
惡之

冬十二月奉表自陳

德明表訴明愛侵耕綏州界乞遣使按視真宗詔
張崇貴詳度令明愛等還居內地然實未侵其界

也

仁宗詔令在四年
正月茲連敘之

大中祥符四年

契丹統和
二十九年

春二月德明遣使入貢

德明貢使所過州軍官吏犒設頗簡真宗以遠人

慕義接不以禮恐生慢心特詔戒之

夏四月賀正汾陰進中書令

德明聞中國正汾陰貢馬稱賀禮畢賜德明衣帶鞍馬器幣賓佐將士銀帛茶葷時貢馬子弟或與京城民爭毆折其齒開封府言當杖脊眞宗詔付鄜延路令移文德明就彼裁處尋遣勾當皇城使韓守殷作坊使張佖爲官告使進德明中書令

秋八月掠回鶻貢奉使西蕃宗哥族發兵援之

甘州數與夏州戰夜落紇所遣貢使過境德明遣

人抄奪吐蕃宗哥族咸中國恩化發兵護送方得
至京師

九月攻涼州樣丹族不克

樣丹西涼大族自作文法素不屬夏州德明遣軍
校蘇守信領蕃騎襲擊六谷大首領所鐸督會諸
族禦之大敗守信兵守信西涼人也

大中祥符五年

契丹開泰元年

春正月德明入貢

夏州貢使在道市物頗擾民真宗詔所在有司嚴
示約束

三月誘延州蕃落不得遂以侵黑林平地入奏

鄜延鈐轄張崇貴卒德明益踰軼常令所部釀酒
招內屬蕃戶飲之誘其叛附飲者多不如約延州
黑林平地向與夏境鄰德明誣爲熟戶侵佔眞宗
令陝西轉運使薛奎按驗奎閱郡籍得德明嘗假
道黑林平文移錄示之德明乃伏

獻馬契丹

契丹畜牧之法西夏與室韋例進馬三百匹是時
德明以良馬二百匹凡馬百匹獻契丹主優賜之

夏四月表乞綏州土田人戶

德明上表請以綏州土田人戶割隸本道邊臣爭之不許德明復使詣闕上訴真宗詔陝西轉運使取德明元進誓書與邊臣詳定報之

冬十一月中國禁使臣造軍器

德明供奉使至京輒仿中國制潛造軍器攜歸真宗下詔禁之

十二月加太保

聖祖降于延恩殿覃恩

大中祥符六年

契丹開泰二年

春二月德明如斡子山

德明雖臣宋與契丹而僭擬日甚是時由夏州如斡子山大輦方輿鹵簿儀衛一如中國帝制

按

此德明僭帝制之始

夏五月党項曷党等部來投不納

東山党項諸部皆順契丹因困徵發悉遁黃河北
依模赧山以居惟曷党烏迷兩部尙居故地遣使
約歸夏州德明不敢納

秋七月以兵從契丹攻党項

契丹主聞曷党等西歸遣使撫諭不聽賜詔德明
曰党項叛我今欲西伐爾當東擊毋失犄角之勢
德明出兵境上應之

八月契丹使賜車馬

契丹主以夏兵助討党項遣引進使李延宏賜德
明及義成公主車馬

九月旺家族首領都子走還環州

隨之走者又三族

大中祥符七年

契丹開泰三年

春二月德明遣使入朝加宣

德功臣號

宣德賜皇子皇親號也德明聞車駕謁太清宮遣使詣行闕朝賀獻方物特加賜號寵異之

秋七月張浦卒

浦銀州人事保吉德明兩世忠誠練達知無不言及卒德明臨其喪哭之慟贈銀州觀察使元昊僭號追封銀川伯

按書夏臣卒始此

冬十一月遣使入貢

德明進奉使每挾帶私物規免市征卹延路鈐轄
張繼能奏請條約眞宗以戎人遠來獲利無幾命
第如舊制

西夏書事

卷九

六

西夏書事卷九終